

黃山圖經



黃山圖舊本四張上載三十六峯中下

飛龍峯下有新興寺又下有龍吟石

石門峯狼豹洞又左之下萬石市

雲門峯下有焦村

翠微寺有廣寺

翠微洞下有五福堂

藍若寺

仙都峯下有福寺

望仙峯下有鄉林寺

九龍洞 藏雲洞

芙蓉峯下有花山寺

朱砂石有湯池 祥符亦在下

浮邱祠之下有黃濟祠 有折足橋

舊本黃山小景祥符祠刊



黃山圖經

宋無名氏著

黃山舊名黟山當宣歙二郡界在歙之西北高一千一百七十丈東南屬歙縣西南屬休寧縣各一百二十里即軒轅黃帝棲真之地唐天寶六年六月十七日勅改為黃山按江南諸山之次者有天目天台二山郡國志云天目山高一萬八千丈而低于黃山者何也以天目近連浙江天台俯瞰滄海地勢傾下百川所歸而宣歙二州即江之上游海之濫觴也今計宣歙之平地已與二山齊焉况此山有摩天憂日之高則浙東西宣歙池饒江信等郡之山竝是此山肢

脉諸峯積石迫如削成煙嵐無際雷雨在下霞城洞室乳竇瀑布無峯不有巖巖之上奇蹤異狀不可摸寫誠神仙之窟宅也山上徃徃聞峯上仙樂之聲自郡至山口一百二十里自山口至湯院又八里磴道崎嶇頗通車馬按周書異記神仙傳云昔軒轅黃帝



問道于廣成子受胎息于容成子吐納而谷神不死
獲靈丹于浮丘翁遂思超溟渤游蓬萊乃告浮丘公
曰願振衣躬侍修煉浮丘公曰擇賢而師學必精奧
棲隱勝地業則易成煉金為丹必假于山水山秀水
正其藥乃靈江南黟山據得其中雲凝碧漢氣冠羣
山神仙止焉地無葷辛境絕腥腐古木靈藥三冬不
凋名花異果四季皆有山高木茂可為炭以成藥迸
泉直瀉狀如飛布下有靈泉香美清溫冬夏無變若
能齋心潔已沐浴其中飲之灌腸萬病皆愈矣黃帝
遂命駕與容成子浮丘公同游此山山有三十六峯
三十六源二十四溪十二洞八巖

第一煉丹峯浮丘公于此山頂上煉丹經八甲子丹
成黃帝即服七粒不籍雲霧昇空遊戲故其上有煉
丹竈下有煉丹源源中有煉丹水下有洗藥溪搗藥
石臼儼然常存

第二天都峯高九百仞與煉丹峯相並如天中羣仙

之所都峯下有香谷源長聞異香馥郁又有香泉溪
泉水中常香美也

第三青鸞峯如青鸞之蹲顧連天都峯高八百二十
仞下有採藥源黃帝曾于此處採藥也

第四紫石峯純是紫石連青鸞峯高六百仞下有湯
泉溪歙州圖經云黟山東峯下香泉溪中有湯泉二
口如椀大出于石澗熱可煮石仙經云山石出硫磺
朱砂其水即熱此殆朱砂乎春時即紅氣味香美周

書異記云黃帝受浮丘公還丹再服四十二粒毛髮
之類鬢潤過常視其肌膚悉皆皺折浮丘公命黃帝
至湯泉浸七日皺折故皮隨水而去斯須湯池中有
黃龍現雲霧翳空上有笙歌之聲逡巡霧氣開散青
天亮皎正當日晝香氣氤氳隨風襲人黃帝浮丘公
容成子同見一珠函一玉壺浮丘公啟之函中有霞
衣寶冠珠履壺中有瓊漿甘露浮丘公曰此是上天
降下以奉黃帝遂授于帝帝乃受之持歸石室

此下
事具

望仙峯下浮丘公遂于南峯題石壁記以示後世尋至唐
大歷中歙州刺史薛邕遣人就立舍宇大設盃斛病
無輕重入者皆愈又至大中五年刺史李敬方患風
疾遂至湯池浸浴六年十一月又入浴因感白龍見
風疾遂瘥乃造白龍堂並勒銘以記其銘曰

黟山南垠湯水沸騰伏陽韜焯陰火潛蒸盛夏不增
窮冬不冰其誰主張唯龍是膺刺郡二年病不能興
發汗五日信而有徵乃作龍堂于湯西陵乃刻龍像

作神依憑非衆非公非巫非僧王佺步將陳顛歛丞
迭掌吾事各勤爾能未盡瞻依去懷憂競苟肆慢心
貽神惡憎盲瞶瘡癩災爾相仍壬申既夏一陰始昇
錫石室壁庶無騫崩遂號湯院請僧主持焉保大二
年元宗皇帝勅為靈泉院宋朝賜名祥符

第五鉢盂峯覆鉢之狀連煉丹峯高八百五十仞下
有新羅庵基址猶存神仙補闕傳云昔劉宋時有一
東國僧人不知姓名于此修禪定學道術一生休絕

三十餘年不出溪口况山下乎于峯脚平石上以錫杖卓出一泉鍊丹而服偶一日彩雲仙樂來迎忽乘龍飄然上昇又有一洞深邃多蛇蟲人不敢入其僧鍊丹之處梁大同中有一樵叟入見一婦鼎石竈藤蘿纏鎖猶在因名仙僧洞洞口陰暗之夜有一燈現宛如星明人謂之聖燈又有擲鉢源其僧常擲鉢于空中久而始下其錫杖泉至今存焉

第六桃花峯連鉢盂峯高八百仞下有桃花源桃花溪即黃帝親種桃花至今徧峯源溪洞中純是桃花三月方盛開每謝之時滿溪水紅流入湯泉溪春即名桃花湯

第七朱砂峯宛如削成高九百仞峯半壁有朱砂巖巖中有朱砂望之如欲崩頽猿猴亦不能到惟飛鳥方及神仙補闕傳云浮丘公黃帝同取此朱砂煉丹故天下獨貴人莫能獲下有朱砂洞朱砂巖朱砂溪溪口水向東流入湯泉溪

第八獅子峯連朱砂峯西南高五百仞宛如獅子蹲踞下有錦霞洞常有錦霞生又有香林源林中常有異香馥郁

第九蓮花峯連朱砂峯北高九百仞如蓮花正開下有蓮花洞蓮花源水流入朱砂溪與桃花溪水合流第十石人峯在蓮花峯北高七百仞宛如人形下有白鹿源曾有白鹿出為人所獵而貢之又有駕鶴洞浮丘公在此駕鶴也

第十一雲際峯在石人峯西南高八百八十仞峯頂入雲際下有藏雲洞長藏白雲又有乳水源味如乳下有布下水落白雲溪溪中長生白雲水向東流入桃花溪

第十二疊障峯連雲際峯西高八百仞峯形如障下有石乳巖巖中長滴石乳其白如雪四季不絕今俗只呼滴水巖又有陰坑源長陰不見日源水東流入白雲溪溪中有一潭如盆下又有一大潭黃帝曾向

此取水煉丹感白龍見名曰白龍潭水入朱砂溪
第十三浮丘峯連疊障峯西南陰劓源南高九百仞
圖經云頂有浮丘公仙壇彩霞靈禽棲止其上即浮
丘公游息之所下有浮丘廟浮丘觀唐會昌中毀折
今有廟存焉每年州縣祈禱立應峯下有五雲源浮
丘公曾于此源中乘五色雲去又有浮丘溪今俗呼
為浮溪水東南流入曹公溪昔有人姓曹于此溪頭
上昇今俗只呼為曹溪又有人至浮丘壇所忽見樓
臺宛然樓前有白蓮池左右有鹽積米積遂歸山下
邀人上山去取了不知其去處也

第十四容成峯連浮丘峯東高九百仞容成子常遊
息于此故有容成溪今俗呼為容溪峯下有紫烟源
長有紫煙籠蓋又有容成洞洞中有容成子故居基
址存焉

第十五軒轅峯連容成峯東高八百九十仞下有紫
芝源周書異記云軒轅黃帝曾于此源採紫芝今長

有紫芝生峯頂有仙石座即黃帝坐處下有仙人洞
紫雲溪長生紫雲不散下有石仙室即黃帝游息之
所曾有樵翁入室中見一道士釀酒道士見樵翁設
一盃樵翁云天性不飲至夜又彈琴說之樵翁坐睡
道士曰汝此宿不得送出洞口忽到朱砂溪便迷入
朱砂洞香林源出不得遂變成毛人今有毛人岩其
室中石鼎石砧剉藥刀痕猶存即黃帝遺跡焉

第十六仙人峯連軒轅峯東北高八百六十仞頂有
二石人宛如刻成相對而坐仙記注云浮丘公與黃
帝經游此處上昇之後雙石筍化為峯可高十丈信
神仙之聖跡俗謂南向者為軒轅黃帝背倚一石屏
迥如玉宸北向者為浮丘公其下石壁高五百餘仞
猿猴亦不能到翫者上紫石峯望之宛如二仙人對
坐下有仙人洞因此名焉

第十七上昇峯連仙人峯西高八百仞黃有人姓阮
于此峯頂上昇今有阮公源阮公岩阮公溪俗呼為

阮溪山下往往日夜聞峯上仙樂之聲

第十八青潭峯連疊障峯北高八百仞下有一大青潭流水傾下可高百餘仞有布水源錦魚溪此溪有錦鱗魚也

第十九翠微峯連青潭峯北高八百五十仞下有翠微源翠微洞又有翠微寺青牛溪黃有樵人于此見一青牛遂前捉之走入水中尋覓不見峯畔有布水傾下此峯屬宣州太平縣界

第二十仙都峯連翠微峯東高八百仞下有仙都源仙都院神仙補闕傳云黟山北峯是神仙所游之處此峯亦係宣州太平縣界

第二十一望仙峯在山北連仙都峯東高八百五十仞周書異記云黃帝容成子浮丘公于此湯池同見一朱函玉壺持歸中峯下石室中飲壺中甘露瓊漿披函中霞衣簪寶冠珠履光輝山谷須臾黃帝乘飛龍前引綵幢珠蓋三仙飄然從峯頂上昇羣臣攀龍

鬚墜地故有龍鬚岩至今長生龍鬚草下有望仙鄉
此處有人望見空中三仙上昇聞絃雲有弦歌之聲
今峯西有弦歌鄉弦歌洞弦歌溪屬宣州太平縣
第二十二九龍峯連望仙峯東南高八百仞九朶合
成如九龍相纏下有九龍岩九龍源九龍洞九龍溪
九龍觀觀今改為僧院天尊見存焉

第二十三聖泉峯在九龍峯西南桃花峯東北宛如
削成上下大中央小狀如腰鼓高八百七十仞頂上

有一湯池人不能到于鄰峯頂上望見池中波浪騰
沸從地中湧出一布水向峯頂東南而下入湯泉源
甘泉源甘泉溪周書異記云浮丘公謂黃帝曰黥山
中峯之頂上有池湯水味甘美可以煉丹煮石蓋此
處

第二十四石門峯即黥山之中峯高八百八十仞下
有石門兩山相通山之半壁有一大石橫架其上通
兩山焉兩畔相對各有一大石床如龜形長數丈通

人行當中有大石塔正圓如月有四層址圓二丈高三丈已上上大下小狀如刻成然非人力所能蓋靈仙所建也半壁有一石凖瓶引嘴狀如杓柄嘴中有孔孔中有飛泉出焉山下有毛人昔唐大曆中至山下為人所殺明日其妻至知夫已亡號咷哭之而去峯下有一石門源石門溪猿猴岩狼豹洞曾有狼豹入巖洞止焉

第二十五碁石峯在石門峯畔高八百仞浮丘公與黃帝圍碁之所也唐天寶中曾有樵翁到見一石棋局布子分明遂撥開取之却回見復如故後人尋之輒速去處下有棋石源

第二十六石柱峯如柱之削成高七百九十仞在棋石峯西北下布石壁故號石壁源

第二十七雲門峯在石柱峯南高八百八十仞兩峯相並如門時時有雲從門中過下有雲門源雲門溪溪水從二峯中流下向東南而去

第二十八布水峯在雲門峯西高七百八十仞下有百藥源源中生百種藥下有紅泉溪溪水紅色布水長十餘丈

第二十九石床峯在布水山東北高八百五十仞頂上有石床長一丈二尺濶五尺如白玉琢成即容成子浮丘公黃帝遊息之所中有碧椀三枚紫石牀三張下有石室源十餘丈如屋

第三十丹霞峯在石床峯西南高八百九十仞時時有丹霞籠之有紅朮源徧源生紅朮有流霞溪時時有流霞隨水而出

第三十一雲外峯在丹霞峯西北高九百仞勢出雲外下有杏花源源中有杏花樹千百株峯頂上有杜鵑花徧峯純是杜鵑花樹下有飛泉溪有瀑布飛泉下十數丈也

第三十二松林峯在雲外峯西高七百仞下有松林溪徧峯皆是松林又有黃連源石榴岩岩上有石榴

樹

第三十三有紫雲峯在松林峯西北高八百九十仞頂上常有紫雲蓋之下有柏木源徧源盡是柏木有榆花溪水流入湯泉溪口合流也

第三十四芙蓉峯在松林峯西高七百五十仞下有白馬源即黃帝遊行之地隔溪南面有馬跡石石上有馬跡三二十餘箇深者可一尺淺者可二三寸宛如泥中所印之跡此是黃帝遺踪明矣

第三十五飛龍峯連芙蓉高八百七十丈

第三十六峯采石峯連飛龍峯西高六百仞下有白

龍岩白龍源俱是白石其石如玉陰暗之夜即見布水流下

右此三十六峯並是從脊以上折算高低山海經云八尺曰仞此外諸峯高二三百仞者並巖洞溪源數千百不啻圖經傳記不書者此皆不載又有一石橋唐開元中曾有一樵人在鍊丹峯北見之跨二石峯

長三二十丈近代又有樵人見在蓮花峯下南復有
前說後有人尋之竟不知去處復有採山人于石橋
下宿半夜聞笙歌從石橋上過至天明亦不見仍迷
舊路之所其山南面及東南面水流入休寧歙縣等
界又大山北面水流入宣州太平縣界外小肢入宣
州界者不能具載大山南面肢脉極多其經□□州
界散入浙東西又江西諸郡者唯有兩肢東□□箬
嶺南面水流入當州界北面水流入宣州□□□界
次東至黃蘗山南面水流入當州界北一口□宣州
太平縣界次入績溪縣界至新嶺東□□流入績溪
縣界東北面水北流入宣州□□縣界東至籠岩山南
面水流入績溪縣界北面□□入宣州旌德縣界東
肢出績溪山西面水流入□□縣界北面水流入宣
州寧國縣界南面水流入杭州唐山縣今昌化縣是
也迤邐一肢東入杭州唐山縣散入浙西諸郡由天
目而止杭州吳山其績溪山又東南起一肢至昱嶺

入歙縣界西南流入歙縣界東面水流入杭州唐山
縣界又南山大抵溪西北面水流入歙縣界東南面
水流入睦州青溪縣今建德路淳安縣是也西肢入
黟縣界至牛泉嶺南面水流入黟縣界北面水流入
宣州太平縣界又南轉入武亭嶺東面水流入黟縣
界西面水流入祈門縣界又南出婺源縣界至浙嶺
南面水流入婺源縣界北面水流入休寧縣界又西
南次至斜山南面水流入婺源縣界北面水流入休
寧縣界又南至大鱗山西北面水流入婺源縣界南
面水流入衢州常山縣界迤邐南出衢州常山縣散
入浙東諸郡其山東西各起一肢西肢西至小歙山
東面水流入婺源縣界南面水流入衢州常山縣界
迤邐西出饒州樂平縣界東肢東出休寧縣界至黃
土嶺北面水流入休寧縣界南面水流入衢州常山
縣界又東至白際嶺北面水流入休寧縣界南面水
流入建德路遂安縣界其牛泉嶺又北引一肢入祈

門縣界至大關嶺西南水流入祈門縣界東北面水
流入宣州太平縣界又轉西南至舉根山東南面水
流入祈門縣界西北面水流入池州貴池縣界又轉
東南出至梅鷄山東北面水流入祈門縣界西北面
水流入饒州浮梁縣界迤邐次南入饒州浮梁縣界
又魚庭嶺引出一肢入婺源縣界至梅源山東南面
水流入婺源縣西南面水流入浮梁縣界又南至濬
源山東面水流入婺源縣界南面水流入饒州浮梁
縣界迤邐入饒州樂平縣界今俱改州按當山肢脉
多其于當州界或從大山界外引肢入諸郡者此皆
不載其浮溪水流入曹溪阮溪水流入容溪二水合
流入豐樂水東南流一百七十二里至郡西合揚之
水入建德路下至錢唐江秋冬涸不勝載春夏勝載
又東肢箬嶺高四百五十丈次引東肢入黃蘗山高
五百丈大山高一千三百七十丈周回一千餘里

黃山圖經終

跋

嘗閱廬山記事謂白石菴遭蜀僧改易致不可攷余
再三歎息夫以藏書盛典蘇文忠公為之記千古佳
話李又涪翁之甥不百年竟同陵谷變遷湮沒無稽
豈不惜哉廬記有魏晉舊裁用是增輝舊文不可漏
落使後來痛惜憾事誠山志要道否則難免強作解
事之謂此黃山圖經一卷北宋無名氏著羅鄂州撰
新安志猶數引此經而後人修志俱未得見則是書

之不傳久矣余族伯望子先生游虞山得此於藏書
家猶是宋時槧本上有吳岫家珍印記其文筆簡古
高妙所記山川形勝源流歸宿如觀掌上螺紋與俗
志有仙凡之別誠足為山靈重信古書之不可及也
彼近志詩文雖多亦奚以為岫雲方成培仰松甫

黃山圖經書後

黃山圖經一卷圖三層四篇上列三十六峯中岩洞
僧舍下寫寺祠村落經三十六則詳著峯巒高大形
勢事跡水源流歸宿一篇其文簡古明晰無冗累誠
異人傑作尾署祥符祠刊版廢久審圖所載如新興
寺萬石市五福堂藍若寺新林寺花山寺黃濟祠折
足橋皆列下方而祥符稱祠何也且山麓湯口未載
豈程氏繇元及明始來遷居著作于前未之及爾余

採藥虞山得此于藏書家寶宋鏤本上有姑蘇吳岫
家珍印記世所希有旋覽之下且喜且愕數尋文獻
足徵竊怪創志者未見圖經不全載卷首致古人書
湮失無傳且峯巒高大溪水源流使後來抵牾聚訟
何哉浮丘告帝按周書異記神仙傳云然新志不能
發揮其所以然者不能為山靈重天寶中樵翁見石
棋布列撥去後再至復再見其為仙客引人入道未
可知余竊笑前此創志未得見不錄卷首徒濫收後

來詩句何其不愛古人耶此經宋無名氏著案所載
開元天寶大中年事或者唐人書而宋人成之也香
沙道人方望子記

